



BOSNIAKISKA ISLAMISKA SAMFUNDET
ISLAMSKA ZAJEDNICA BOŠNJAKA U ŠVEDSKOJ

BILTEN

BR. 30

Informativne novine IZB u Švedskoj

MART 2017



VAKUF - TRAJNO DOBRO

NE ZABORAVIMO SVOJ IDENTITET
PRUŽIMO SVOJOCJ DJECI VIŠE OD IGRAČAKA

ISLAMSKA ZAJEDNICA BOŠNJAKA BORAS
BOSNISK ISLAMSIKA FORSAMLINGEN BORAS

VAKUF FOND

BG: 5051-0049  123 213 61 58

PG:185 71-0
SWISH 123 563 84 16

**Džemat
Borås**

**Džemat
Örebro**

**SEKRETARIJAT
IZBUŠ**

email: kontakt@izb.se
tel. 0520-49 90 64
mob.0763-10 2 447

Adresa:
BIS, Åkerssjövägen 10
461 53 Trollhättan
Radno vrijeme:
Radnim danom od 08:00 do
16:30m

PG: 73 88 14-3

www.izb.se
Potražite nas i na facebook-u
Islamska zajednica Bošnjaka u
Švedskoj

**UVODNIK**

Tokom prva tri mjeseca ove godine u našim džematima su održane redovne godišnje skupštine, a 18. marta i Skupština Islamske zajednice Bošnjaka u Švedskoj, o čemu opširnije pišemo u ovom broju Biltena. Razmišljajući šta bi tim povodom mogli poručiti, preporučujemo jedan kur`anski ajet i jedan hadis Muhameda, a.s.

U suri Ali Imran, 103. ajet, Allah, dž.š., kaže:

„I svi se Allahovog užeta držite i nikako se ne razjedinjujte!“

A Muhamed, a.s., je rekao:

„Isticati Allahove blagodati, znak je zahvalnosti; a to ne činiti, znak je naznaboštva.

Ko nije zahvalan na malom, neće biti zahvalan ni na velikom, a ko nije zahvalan ljudima, neće biti zahvalan ni Allahu.

Složna zajednica je milost Allahova, a razdor u zajednici je kazna i patnja.“

Gospodaru naš, čuvaj nam naše džemate i našu Zajednicu.

Idriz-ef. Karaman

Hadž**Prijave za odlazak na hadž****Skupština****Održana skupština IZBUŠ-a****Aktivnosti****Rad bosanskohercegovačkih organizacija****Seminari****Održan seminar i predavanja za roditelje****Oglas****Poziv svršenicima i svršenicama medresa****Sjednica****Održana sjednica Savjeta glavnog imama****Konferencija****Poziv na konferenciju o maternjem jeziku**

U ovom broju objavljujemo:

- **Ženski aktivizam**
- **Dušebrižništvo u zatvorima i bolnicama**
- **Projekt On line**
- **Hutba: Hadž (hatib Fuad-ef. Čolić)**

Hadž 2017



Hajj 2017

Ovim obavještavamo zainteresirane kandidate za hadž da Islamska zajednica Bošnjaka u Švedskoj i ove godine organizira odlazak na hadž.

Preliminarni polazak na hadž je 23. ili 24. avgusta, a povratak 13. ili 14. septembra.

Za dobijanje vize potrebno je pribaviti sljedeće dokumente:

- Pasoš koji važi još najmanje 6 mjeseci. Ukoliko pasoš nije švedski, potrebna je boravišna dozvola koja, također, važi još najmanje 6 mjeseci.

- Personbevis na engleskom jeziku

- Četiri fotografije pasoškog formata sa svijetlom pozadinom
- Žuti karton za vakcinu protiv meningitisa
- Popunjen i potpisan formular za prijavu za hadž
- Za žene mlađe od 45 godine, ukoliko im je mahrem (pratilac) muž, potrebno je dostaviti vjenčani list na engleskom jeziku, a ako je mahrem otac, brat ili sin, personbevis na engleskom jeziku koji potvrđuje rodbinsku vezu.

Kompletnu dokumentaciju treba poslati najkasnije do 1. avgusta, a formular prijave za hadž i kopiju pasoša do **10. maja 2017.** na adresu:

Bosniakiska Islamiska Föreningen

Box 8120

200 41 Malmö

Napomena:

Uz prijavu za hadž obavezno je odmah uplatiti akontaciju u visini od 10 000 kruna.
(Uplate se vrše na P.G. broj: 73 88 14 – 3)

Cijena aranžmana je **41 000 SEK.**

U cijenu je uračunato sljedeće: povratna avionska karta, boravak u Saudijskoj Arabiji na bazi polupansiona, ihram i dvije manje torbe, serdžada i priručnik za hadž.

U cijenu nije uračunat kurban.

Napominjemo, također, da je broj mjesta i ove godine ograničen i da prednost imaju oni kandidati koji se prvi prijave. Osim toga, odlukom Ministarstva za hadž Saudijske Arabije, ni ove godine na hadž ne mogu putovati hadžije koji su hadž obavili u posljednjih 5 godina.

Kontakt telefon za dodatne informacije: **0707 300246**

Održana skupština IZB u Švedskoj

U subotu, 18. marta 2017. godine u Göteborgu je održana redovna izvještajna Skupština Islamske zajednice Bošnjaka u Švedskoj. Uz prisustvo 64 delegata iz 20 džemata, te članova Izvršnog odbora i drugih organa IZBUŠ, Skupštinom je predsjedavao Elvir Gigović iz džemata Stockholm.

Na početku zasjedanja delegatima se obratio predsjednik džemata-domaćina Muhamed Buljubašić, a onda gosti: predsjednik NBV Vidar Aransson, koordinator projekta bosanskog jezika Muhidin Čolić, koordinator projekta „Online“ Emir Poljo, član Izvršnog odbora „Merhameta“ Švedske Hazim Avdić, te predsjednik Bemufa Haris Delić.



U radnom dijelu prvo su podneseni i, nakon diskusije, usvojeni izvještaji za 2016. godinu.

U nastavku zasjedanja pristupilo se diskusiji o izmjenama i dopunama normativnih akata, a onda i glasanju o predloženim dokumentima. Izmjene u Statutu IZBUŠ i Pravilniku o jedinstvenoj članarini i vjerskim uslugama nisu dobile potrebnu većinu, dok je prijedlog za osnivanje Fondu solidarnosti i Pravilnik o raspodjeli njegovih sredstava dobio podršku delegata Skupštine. Usvojena je i dopuna Poslovnika o radu skupštine IZBUŠ.

Na kraju su usvojeni plan rada i budžet za tekuću godinu.

Prije samog završetka Skupštine Elviru Gigoviću je uručen prigodan poklon za njegov angažman u Švedskom muslimanskom savjetu

Skupštinsko zasjedanje okončano je ašeretom, kojeg je proučio Mubin-ef. Neimarlija iz Trelleborga.

I.K.

Zajednički rad bosanskohercegovačkih organizacija na očuvanju maternjeg jezika

U Stockholmu je 11. marta 2017. godine održan sastanak Koordinacionog tijela na kojem je zvanično potvrđen rad ovog tijela kao koordinirajućeg mehanizma usmjerenog na zajedničko djelovanje šest bosanskohercegovačkih organizacija u Švedskoj, a koje u saradnji sa Institutom za jezik iz Bosne i Hercegovine, Ambasadom Bosne i Hercegovine i NBV-a zajedno rade u oblasti izučavanja maternjeg jezika u Švedskoj.

Na sastanku je usaglašen projekt „Maternji jezik i višejezičnost kao ključ razumijevanja“ za 2017. godinu, u okviru kojeg su predstavljene zajedničke projektne aktivnosti naših organizacija, ali i pojedinačne aktivnosti koje će biti realizirane na nivou svake organizacije. Dogovoreno je da osnovna zajednička aktivnost u 2017. godini bude kampanja o važnosti izučavanja maternjeg jezika, kroz koju će, između ostalog, javnosti biti prezentiran dosadašnji rad naših organizacija na ovom polju, te aktivnosti koje će biti realizirane u tekućoj godini.

Islamska zajednica Bošnjaka u Švedskoj pripremila je programske aktivnosti kojima će se u toku 2017. godine usmjeravati prema svome članstvu i široj javnosti, a prva aktivnost planirana je već 22. aprila kada će u Göteborgu biti organizirana konferencija o bosanskom jeziku na kojoj će sudjelovati imami i predsjednici svih džemata u Švedskoj, te profesori iz Instituta za jezik iz Bosne i Hercegovine.

Inače, Koordinaciono tijelo koje je od aprila 2016. godine, kada je pokrenuta inicijativa o njegovom osnivanju, funkcioniralo kao Koordinaciono tijelo u osnivanju, formirano je od predstavnika: Islamske zajednice Bošnjaka u Švedskoj, BEMUF-a, Saveza bosanskohercegovačkih udruženja u Švedskoj, Bosanskohercegovačko-švedskog saveza žena, APU mreže, Bosanskohercegovačkog saveza žena u Švedskoj i predstavnika Instituta za jezik iz Bosne i Hercegovine.

Predsjedavajuća Koordinacionog tijela je Azra Jelačić, predstavnici IZBUŠ-a i BEMUF-a su Mustafa-ef. Šetkić i Haris Delić, ispred dva saveza žena su Almedina Sačić i Mirsada Zahirović, Darko Kršek kao predstavnik APU mreže i Muhidin Čolić ispred Instituta za jezik iz Bosne i Hercegovine.



Održani seminari za roditelje



U nedjelju, 12. marta 2017. god., u džematu Halmstad, održan je seminar za roditelje na temu: „Razvoj roditeljskih kompetencija u relacijama sa djecom u pubertetu.“ Gost predavač bio je hadži doc.dr.sc.Ahmed Buljubašić, rođen 1981.god., seminar je održan uz saglasnost Uprave za vanjske poslove i dijasporu Rijasetu.

Nakon uvodnih riječi domaćina, dr.Ahmed je govorio o greškama koje roditelji prave u odnosu sa djecom prije nego nastupi pubertet. Zatim, šta bi roditelji mogli učiniti za sebe kako bi smanjili stres u periodu puberteta svoje

djece, šta mogu učiniti za svoju djecu u pubertetu i koji su to nepoželjni oblici ponašanja djece u pubertetu.

Prisutni su s posebnom pažnjom pratili izlaganje, a nerijetko i govorili o svojim iskustvima kroz koja su prošli.

Poslije uvodnog predavanja, održana je diskusija u kojoj su roditelji postavljali pitanja. A nakon diskusije, održana je i grupna radionica na temu „Porodica pod jednim krovom“. Cilj radionice bio je da svaka od grupa izabere po jedan porodični problem sa unaprijed pripremljenog dokumenta i da iznesu drugim učesnicima ko se u toj grupi susreo s tim problemom i kako je riješio. Ukoliko niko u grupi nije imao taj problem, pitanje se prenosi u druge grupe ili se postavlja kao da je bio i razgovaralo se kako riješiti taj problem.

Pored džemata Halmstada, u petak i subotu na istu temu je održano predavanje u džematima Växjö, Malme i Helsingborg.

U svim džematima u kojima su organizovana predavanja roditelji su iskazali veliko zadovoljstvo i pozdravili ovu aktivnost kao nešto nužno potrebno našim roditeljima. Izdajamo jedan od mnogobrojnih pozitivnih komentara u kojem jedan od roditelja izjavi: „kao da je sjedio i gledao šta se dešava u našim kućama.“

Doc.dr.Ahmed Buljubašić zvanje profesora pedagogije stekao je na Filozofskom fakultetu Univerziteta u Sarajevu. Te postdiplomski studij i doktorsku disertaciju iz oblasti pedagogije odbranio je na istom fakultetu u Sarajevu, gdje je stekao zvanje doktor pedagoških nauka. Od 2015.god. angažiran je u zvanju docent za užu naučnu oblast Pedagogija na Filozofskom fakultetu Univerziteta u Zenici.



Poziv svršenicima i svršenicama medresa koji žive u Švedskoj

Islamska zajednica Bošnjaka u Švedskoj priprema bazu podataka imama i muallima, koji bi mogli i željeli mijenjati naše aktivne imame na džuma namazima, vjerskoj pouci i drugim obavezama, za vrijeme godišnjih odmora i drugim prilikama.

Stoga, pozivamo sve svršenike i svršenice medresa, koji žive u Švedskoj a nisu angažirani u nekom od naših džemata, da se jave glavnom imamu Idriz-ef. Karamanu, na mejl adresu: idrizzkaraman@hotmail.com

Održana sjednica Savjeta glavnog imama

U srijedu, 22. marta 2017. godine, održana je sjednica Savjeta glavnog imama Islamske zajednice Bošnjaka u Švedskoj.

Na sjednici su dogovorene aktivnosti oko ovogodišnje organizacije hadžaje, završetka mektebske nastave, te takmičenja polaznika mektebske nastave.

Savjet glavnog imama donio je odluku da i ove godine pripremi brošuru za kurban i hadž.

Na kraju je glavni imam predstavio dva veoma važna projekta koji će se u narednom periodu realizirati u našim džematima. Radi se projektu maternjeg jezika i izradi baze podataka Bošnjaka u dijaspori.

Treba još kazati da su se članovi Savjeta odlučili za telefonsku sjednicu da što prije otpočnu spomenute aktivnosti, ali i da se uštedi vrijeme i finansijska sredstva.



Islamska zajednica Bošnjaka u Švedskoj



Maternji jezik i višejezičnost kao ključ razumijevanja

Poziv na konferenciju o maternjem jeziku

Pozivaju se predstavnici, imami i predsjednici ili drugi predstavnici, svih džemata u Švedskoj da učestvuju na prvoj konferenciji o bosanskom jeziku koja će, kao dio projekta "Maternji jezik i višejezičnost kao ključ razumijevanja", biti održana 22. aprila 2017. godine sa početkom u 11:00.

Konferenciju organizira Islamska zajednica Bošnjaka u Švedskoj u saradnji sa Institutom za jezik iz Bosne i Hercegovine, a uz podršku NBV-a.

Konferencijom se želi ukazati na stratešku ulogu Islamske zajednice Bošnjaka u Švedskoj u očuvanju bosanskog jezika i bosanskohercegovačke kulturne baštine, te predstaviti mogućnosti i modele učenja bosanskog jezika kroz programske aktivnosti usmjerene u tom pravcu.

Pored koordinatora Projekta Muhidina Čolića, na konferenciji će učestvovati: direktor Instituta za jezik dr. Alen Kalajdžija, stručna saradnica mr. Aida Kršo, te književnik Hadžem Hajdarević.

Detaljne informacije o planu i programu Konferencije dostavit ćemo vam u narednom periodu.

Broj učesnika nije ograničen. Džemat treba odrediti jednu osobu koja će biti koordinator projekta ispred džemata.

Molimo vas da, najkasnije do 17. aprila, prijavite svoje učesnike na kontakt@izb.se

Radi smanjenja putnih troškova obavezan je zajednički dolazak džematskih učesnika. Ukoliko niste u mogućnosti zajednički putovati, potrebno je da kontaktirate Sekretarijat IZBUŠ.

22. april 2017.g. 11.00

Prostorije Islamske zajednice
Bošnjaka u Geteborgu
Generalsgatan 2B

Prijave na kontakt@izb.se



Ženski aktivizam - saradnja



Ovih dana je sekcija ručnih radova džemata u Stockholmu dobila vrijedan poklon od sekcije džemata Malmö. Poklon-paket, sa puno vunica, konca za pletenje i vezenje, kao i raznih igala, uručila je vrijedna Safija Imširović. Ovom lijepom poklonu posebno se obradovala Fikreta Kauković, vođa sekcije ručnih radova u džematu u Stockholmu, koja je pod tim dojmom, odlučila da organizira sekciju ručnih radova i za polaznice mekteba.

Primjer je ovo, zaista, vrijedan pažnje. Tim povodom, neko reče: **”Žena-Bošnjakinja je institucija za sebe.”**

F.J.



„Mina tankar går till offren och deras anhöriga. Hoppas att de skyldiga grips snabbt och att Sverige förblir ett öppet, demokratiskt och fritt land. Jag höjer min röst mot terrorn, för fred och frihet, men också för rättvisa och solidaritet mellan människor.“
Imamen Smajo Sahat

Vjerski život u zatvorima i pritvorima - Kriminalvården



U švedskom Kazнено-popravnom zavodu (Kriminalvården) je angažirano oko 170 svećenika, pastora, đakona i imama koji zavisno od angažmana i potreba posjećuju klijente sedmično ili nekoliko sati mjesečno.

Zadatak angažovanih je da posjećuju klijente koji su u potrebi za privatnim ili grupnim razgovorom, te da organizuju vjerski život.

Pri svakom zatvoru i pritvoru ima odbor za duhovnu njegu (NAV), koji koordinira rad duhovne brige.

Švedsko-kršćansko vijeće (SKR) ima cjelokupnu odgovornost za duhovnu brigu pri Kriminalvården.

Iz naše Zajednice (IZBUŠ) angažovana su naša dva imama. Smajo -ef. Šahat (džemat Skövde) i Almedin-ef. Spahić (džemat Halmstad).

Dušebrižništvo u bolnicama

KÄNNER DU TILL
DEN ANDLIGA VÅRDEN
PÅ SJUKHUS FÖR
MUSLIMER?

MUSLIMSKSJUKHUSKOORDINATOR.SE

Svaki čovjek tokom svog života susreće se sa zdravstvom. Nekad je to bolest, ponekad opet iznenadna nesreća. Nekad je to lično iskustvo, ponekad opet iskustvo nekog iz porodice ili prijatelja. U ovakvim, često nepredvi-divim, prilikama, pored zdravstvene pomoći, veoma važna je i pomoć duševno-vjerskog karaktera, koju nazivamo dušebrižništvo, a koje je u Švedskoj veoma razvijeno.

Ranije je gotovo u potpunosti Švedska crkva imala monopol u organizaciji ovih aktivnosti. Dolaskom, međutim, velikog broja muslimana u Švedsku bitno je promijenjen koncept dušebrižništva na ovim prostorima. Danas,

pored velikog broja svećenika Švedske crkve, u čak sedam regija djeluje deset koordinatora-muslimana (najčešće imama, među kojima i nekoliko naših bošnjačkih). Regije u kojima su angažirani koordinatori su: Stockholm, Skaraborg, Skåne, Norrland, Jönköping, Värmland i Östergötland.

Uloga ovih kordinatora je da budu spona između bolnice i džemata. Njihov zadatak je da uspostave i etabliraju kontakt sa bolnicom i džematima, da, u saradnji sa džematima, naprave kontakt liste osoba koje će posjećivati pacijente muslimane u bolnicama.

Angažman osoba na kontakt listama je volonterski, dakle, bez novčane nadoknade, izuzev putnih troškova.

Ovaj projekt je prilika da pomognemo našim bolesnim članovima, kojih, nažalost, ima veliki broj po bolnicama širom Švedske. Zbog toga bi se naši džemati trebali angažirati na pronalasku što većeg broja osoba koje bi posjećivale naše ljude u bolnicama.

Projekat On line



Islamska zajednica je u saradnji sa fondacijom „Bosna 21“ pokrenula aktivnosti na evidentiranju i povezivanju Bošnjaka diljem svijeta.

U tu svrhu razvijena je online-aplikacija „Projekat.online“ putem koje se evidentiraju svi Bošnjaci svijeta. Tako dobijeni podaci će koristiti za kontakte, obavještenja, svojevrsan interni popis, te aktivnosti vezane za glasanje na izborima u domovini.

U vezi s ovim projektom organizovat će se tribine u nekoliko naših džemata u Švedskoj i to po slijedećem rasporedu:

Džemat Malmö - 13.april, 18.00h

Džemat Göteborg - 14.april, poslije džume-namaza

Džemat Borås - 14.april, 18.00h

Dzemat Örebro - 15.april, Manifestacija u povodu 20 godina Bemufa

Dzemat Västerås - 16.april, 12.00h

Dzemat Stockholm - 16.april, 18.00h

Dzemat Norrköping - 17.april, 12.00h

Dzemat Jönköping - 17.april, 18.00h

Gosti tribina su koordinatori Projekta g.Ramiz Salkić, potpredsjednik RS-a (BiH) i g. Emir Poljo (Švedska).





Hutba - Hadž

Hvala Allahu, dž.š., na svim blagodatima, a blagoslovi i selami Njegovom poslaniku Muhammedu, s.a.v.s.
Cijenjeni džemaate!

U današnjoj hutbi govorimo o hadžu, u želji da vas upozorimo na ozbiljnost ove obaveze, pogotovo onima koji su u mogućnosti da je izvrše.

Hadž je obaveza svakom punoljetnom i pametnom muslimanu i muslimanki, ukoliko imaju materijalne i vjerske uvjete da ga obave.

Šta je hadž i šta znači riječ hadž? Riječ hadž znači: cilj, svrha, namjera.

Sa fikhskog (obredoslovnog) stanovišta, to je namjera i putovanje u Mekku, s ciljem obavljanja određenih obreda, u određeno vrijeme i pod određenim uvjetima.

Hadž je jedan od stubova islama i zbog toga ga je obavezno obaviti jedanput u životu, naravno, ako je osoba u mogućnosti.

U Kur'anu, u 97. ajetu sure Ali Imran, stoji:

"Hodočastiti Kabu dužan je, Allaha radi, svaki onaj koji je u mogućnosti; a onaj koji neće da vjeruje – pa, zaista, Allah nije ovisan ni o kome."

U suri El Hadždž, 27-28. ajet, Allah, dž.š, kaže:

"I oglasi ljudima hadž! – dolazit će ti pješke i na kamilama iznurenim; dolazit će iz mjesta dalekih, da bi koristi imali i da bi u određene dane, prilikom klanja kurbana, kojim ih je Allah opskrbio, Njegovo ime spominjali".

U svom govoru Allahov poslanik, a.s., je podsticao vjernike da obavljaju hadž. Tako je jedne prilike rekao:

"Islam se temelji na pet stvari: svjedočenju da nema Boga osim Allaha, da je Muhammed, a.s., Allahov Poslanik, obavljanju namaza, davanju zekata, postu mjeseca ramazana i obavljanju hadža".

Na oprosnom hadžu Poslanik, sallallahu alejhi ve sellem, je rekao:

"O ljudi, Allah vam je propisao obavljanje hadža, pa ga obavljajte".



Ebu Hurejre, radijallahu anhu, prenosi da je čuo Allahovog poslanika, a.s., kako kaže: **"Ko obavi hadž ne čineći pri tome grijeha i prijestupe, vratit će se čist od grijeha kao na dan kada ga je majka rodila"**.

On, također, prenosi da je Muhammed, a.s., rekao: **"Umra do umre briše ono što je između njih od grijeha, a za ispravan i primljen hadž nema druge nagrade osim Dženneta"**.

Poštovana braćo i sestre, obratimo pažnju na završetak ajeta iz sure Ali Imran: **"a onaj koji neće da vjeruje – pa, zaista, Allah nije ovisan ni o kome"**.

Dobro razmislimo! Ukoliko nam je Allah, dž.š., dao mogućnost da obavimo hadž, a mi ne želimo ili nećemo, **označeni smo kao nevjernici**. Hazreti Omer, r.a., je rekao: **"Ko je u mogućnosti da obavi hadž, pa ga ne obavi, svejedno je za njega, umro on kao Jevrej ili kao kršćanin"**. (Sahihu-l- Buhari)

Neki muhaddisi (prenosioci hadisa) među kojima je i Tirmizi, r.a., ove hazreti Omerove riječi pripisuju Muhammedu, a.s.

Ukoliko želimo čišćenje od grijeha, zadovoljstvo i oprost od Allaha, dž.š., vlastito zadovoljstvo u duši i životu na ovom svijetu, a na kraju i Džennet, onda neće biti mjesta dvojbi, opravdanjima, niti bilo kojim razlozima da ne obavimo hadž.

U vrijeme obavljanja hadžskih obreda, na Arefatu, hadžije uče dove, a najbolja dova je baš tu, na Arefatu. Muhammed, a.s., u hadisu kojeg bilježi Muslim, kaže:

"Najbolja dova je dova na dan Arefata, a najbolje što sam rekao i što su govorili poslanici prije mene je: Nema Boga osim Allaha Jedinog, On nema sudruga, Njemu pripada vlast i zahvala, On oživljava i usmrćuje i On sve može".

(LA ILAHE ILLELLAHU VAHDEHU LA ŠERIKE LEHU LEHU-L-MULKU VE LEHU-L-HAMDU VE HUVE 'ALA KULLI ŠEJ'IN KADIR.)

Čuli smo kako Muhammed, a.s., govori o vrijednosti i hadža i umre, pa zar ima iko ko ne bi poželio obaviti hadž i umru ako su mu date mogućnosti, osim onih koji ne vjeruju?!

Mogli bismo o hadžu i umri pričati danima, ali osobni doživljaj posjete Allahovoj, dž.š., kući i gradu Meki, koju je Allah, dž.š., učinio Svetom, neponovljivi je doživljaj, kojeg je nemoguće opisati.

Zar ćeš to propustiti, a data ti je mogućnost?!

Molimo Uzvišenog Gospodara Kabe da nam oprost, smiluje se i učvrsti korake na putu islama

Hatib: Fuad-ef. Čolić



BILTEN



imam*ba*

ISLAMSKI PORTAL ZA SVE VAS!

www.imam.ba



POZIV NA SARADNJU

Oglasite se i Vi u Biltenu IZB u Švedskoj!

Javite nam se sa vašim tekstom, prijedlogom, primjedbom i sugestijom.

e-mail: bilten@izb.se

BILTEN

Informativne novine

**Islamske zajednice
Bošnjaka u Švedskoj**

GLAVNI UREDNIK

Idriz-ef. Karaman
glavni imam

IZVRŠNI UREDNIK

Almedin-ef. Spahić

REDAKCIJA:

Savjet glavnog imama:
Hasan-ef. Jašarević
Fuad-ef. Čolić
Elvedin-ef. Bešlija

SARADNICI:

Fadila Jašarević,
Stockholm

Muhidin Čolić, Sarajevo

Stari brojevi/arhiva:

[www.izb.se/index.php/
bilten](http://www.izb.se/index.php/bilten)

Bemuf

www.bemuf.org